

新刊白樂天文集序

唐多文士而莫盛于韓柳嗣而和者劉夢得杜牧李翱皇甫湜其人也然所謂抵轢晉魏上軋漢周其惟韓乎樂天之才不下數子其文乃以澄淡簡質為工若有意于偶俗好而無意取高于天下故或淪

入於淺近而後世之慕尚其文
與數子等何邪文固以人而重
也樂天之仕於朝也歲旱蠲貸
詔節未詳度支繫囚經赦不宥
人不敢言也輒力言之無所怵
于頔以歌舞人納禁中李師道
以私錢贖魏徵故第以掠美王

鏐加平章孫璿擢節使承瓘為制
將車駕好畋獵人不敢言也皆力
言之無所怵其為州刺史也築堤
以捍風潮儲水以溉禾畝浚井以
便民汲更歷數州惠政彌衆且素
善李紳而不入德裕之黨素善牛
僧孺揚虞卿而不入宗閔之黨素

善夢得而不入任文之黨中道
而立風節偉然是豈餘子徒能
絺章繪句者倫哉世謂樂天每
作詩問老嫗解者乃錄之夫詩
至於老嫗解烏得以為詩張文
潛據詩草之塗竄以証其非固
其所也其無乃於幽詭怪竒不

可致詰之語不肯道邪嘗即其集
諦觀之蓋不獨詩之擅五長也而
其文言與意會意隨言暢匡掖國
體昭闡物情論議之切當叙狀之
詳明言必中當時之病而有裨於
生人之化若淡而穠若質而華若
淺近也而實淳蓄凡其出處進退

鬱抑順適憂世憫俗欲施所蘊
以為經制之業與其不得施者
悉於文焉發之開闔起伏具應
律度雖非韶濩之純和而不失
為善鳴之音雖非河圖天球之
混成而不失為貴重之器惜其
晚為當路所忌偃蹇不合自放

於東都香山池沼林木詩酒之間
而惑浮屠之說未能盡出于仁義
道德之正其所以異於韓輩者殆
此類夫吾友太保武定侯郭君世
臣既梓其詩行于世間以朝士大
夫僉欲併觀其文遂取先賓竹公
所藏善本復刻之屬余為序昔東

坡最喜樂天之為人徃徃形諸歌詠君亦志坡之志而慕尚有加者歟自總鎮兩廣還

朝即上時務八事


朝議韙之而於樂天四害等疏虞人等箴尤稱頌不置如聆謦欬而親見其人蓋喬木世家與

國同休崇文事以建其本屬武畧以達諸用其意遠矣况廣是集于久湮之後示士林于鮮睹之際又東坡之所無也

正德十四年歲次己卯十月朔吉賜進士及第通議大夫禮部左侍郎前兩京國子祭酒

經筵

國史官永嘉王瓚序



白樂天文集目錄

卷之一

詔 五十七道

卷之二

制 四十一道

卷之三

制 四十九道

卷之四

制 五十一道

卷之五

制 二十九道

卷之六

制 三十道

卷之七

制 三十四道

卷之八

制 三十二道

卷之九

卷之十

制 三十九道

表 五十五道

卷之十一

奏状 二十三章

卷之十二

奏状 二十一章

卷之十三

奏状 十四章

卷之十四

策十一篇

卷之十五

策十五篇

卷之十六

策九篇

卷之十七

策十二篇

卷之十八

策十五篇

卷之十九

策十一篇

卷之二十

策十三篇

卷之二十一

判五十一條

卷之二十二

判五十條

卷之二十三

書十四篇

卷之二十四

書六篇

卷之二十五

書四篇

卷之二十六

文十六篇

卷之二十七

文十六篇

卷之二十八

碑銘七篇

卷之二十九

碑銘五篇

卷之三十

墓誌銘六篇

卷之三十一

墓誌銘七篇

卷之三十二

記十三篇

卷之三十三

記九篇

卷之三十四

議論序九篇

卷之三十五

論衡傳解并池上篇四篇

卷之三十六 年譜

目錄終

白樂天文集卷之一

浙東觀察使元稹徵之纂集
太保武定侯鳳陽郭勛重編

詔

與薛萃詔

勅薛萃楊君靖至省所陳謝具悉卿勤王之節狗公
滅私事主之誠移忠資孝苟非褒贈何以顯揚且清
白之風既自家而刑國則寵旌之澤宜因葉以流根
式遵追遠之經用表教忠之訓是為禮典煩致謝章

與嚴礪詔

勅嚴礪薛光朝至所陳謝具悉卿徇公竭誠臣節克著揚名濟美子道有光教忠既本於義方追遠宜崇於禮命俾優褒贈爰慰孝思秩貴冬官以表過庭之訓封榮石窀用旌徙宅之賢雖示新恩允符舊典遠煩陳謝深見懇誠

與餘慶詔

勅餘慶省所謝陳具悉卿累居袞職時謂盡忠自正洛師日聞報政臣節既彰於宣力子道莫大於揚名

俾光孝思爰舉禮命榮褒冢宰寵賁幽靈式是彝章
豈為私渥有煩陳謝深見誠懷

與從史詔

勅從史揚幹至省所奏今月七日到洛城縣降雪尺餘兼奏耆老等詣闕請立碑并手疏通和劉濟本末事宜者具悉卿分朕之憂求人之瘼時降大雪豐年表祥豈惟澤及土田將使物無疵癘休慶斯在慰望良深耆老等詣闕庭請立碑記尋已允許當體誠懷以旌政能無至陳讓知卿協比其鄰翼戴為意陳此

手疏發於血誠忠懇彌彰嘉歎不已永言臣節何日
忘之想宜知悉

與劉臯詔

勅劉臯省所陳賀具悉朕自守睿圖每思寬政慮先
禁暴念在措刑李錡負國反常阻兵干紀未勞師旅
已就誅夷卿宣力納忠秉心嫉惡遠陳慶賀深見懇
誠想宜知悉

與元衡詔

勅元衡卿立身許國竭力匡君人之具瞻予所嘉賴

凋殘是卹遠藉宣風之能利澤所資暫輟為霖之用
慈和既敷於兵後惠信當洽於言前永念忠勤豈忘
寤想計卿行邁已到西川涉遠冒寒固其勞頓勉加
綏撫以副朕懷想宜知悉

與顏証詔

勅顏証戴岌至省所賀及謝王國清克五嶺監軍具
悉卿職在撫綏任兼備禦忠勤夙著聞望日彰言念
于懷豈忘寤寐乾象昭感壽星垂文與時相應有道
則見顧慙菲德何以當之卿戎旅事殷宜有監領蓋

為常例煩致謝陳想宜知悉

與從史詔

勅從史省所陳謝追贈亡母并舉薦韋悅具悉卿推誠奉國積慶承家既彰盡節之忠宜洽流根之澤雖祿難逮養已闕靈於九原而孝在顯親宜旌賢於三從俾崇封贈以極哀榮韋悅既有才能又所請委卿即發遣令赴闕庭卿之忠誠朕所識察豈待陳露然後知之載覽來章益加懇切想宜知悉

與季安詔

勅季安省所陳請具悉卿朕纂承鴻業司牧蒼生僅致小康未臻大化實慙薄德未稱崇名而華夷兆人內外羣后屢有勤請難於固違卿遠獻表章明徵典訓納忠於上歸美於君勉從懇誠良用愧惕儲貳者上繼宗祖下奠邦家心豈暫忘事或未暇尚阻來請當臚所懷

與高固詔

勅高固卿奉國戴君必竭忠節統戎護塞克著勲勞自領藩垣委之心膺忠懇之志以而益彰欽歎在懷

何嘗暫忘以卿三從軍旅多在邊陲歲月積深勤勞
滋久所宜出入中外周旋寵光今授卿檢校尚書右
僕射御史大夫兼右羽林軍統軍以端揆之崇兼環
衛之師遂卿望闕之戀表朕念功之心仍賜卿官誥
宜即赴闕庭想宜知悉

與茂昭詔

勅茂昭盧校至省所奏請上尊號及建備闕賀誅李
錡并進馬者具悉卿朕以寡德祇嗣丕圖雖致小康
豈稱大號逼於人望遂抑予懷永惟強名實愧虛受
儲貳者上繼宗祖下奠邦家心非暨忘事或未暇尚
阻來請宜體所懷李錡包藏亂心奮發兇德不勞征
討自就誅夷想卿忠誠倍以為慰所進馬馴良可尚
服御且閑取其戀主之心足表為臣之節再三省覽
嘉歎久之想當知悉

答劉濟詔

勅劉濟省所奏茂昭送卿管內百姓殷進解等七人
奏前後事由具悉卿為國大臣與君同體寬而得衆
忠以忘身每徇公而滅私能虛懷以容物與茂昭疆

場之事小有違言曲直是非朕已明辯卿外崇藩翰
內贊謨猷念屈已以為心或難容忍思戴君而是力
宜務叶和勉卿寬裕之懷助朕含洪之化想宜知悉

與柳晟詔

勅柳晟卜英琦至省所奏慶雲并進畚者具悉昌運
將開祥符先見發自和氣聚為慶雲捧日而五色相
宣垂天而萬物咸覩斯為嘉瑞宜契昇平朕方致小
康未臻大化受茲玄貺祇惕良深卿以誠事君惟
奉上獻輪悃於圖畫陳懇欵於表章披閱再三竊增

嘉歎

與仕明詔

卿以鎮邊防初膺閫寄式旌勤效俾洽恩榮褒德念
功故進封以示寵忠誠亮節宜因實而錫名既表新
恩亦推舊典今改封卿丹陽郡王仍改名忠亮勉勤
乃事以副所懷想宜知悉

與崇文詔

勅崇文既班至省所謝亡妻邑號具悉卿有濟時之
勲寵居衮職士政承積善之慶列在王官俾洽恩光

故加褒贈念棹桐之早落不及夫榮追采苜之遺芳
宜從子貴式崇寵命以賁幽靈省茲謝章良用嘉歎

與希朝詔

勅希朝劉忠謹至省所奏沙陀突厥共一千八百七
十人并駝馬器械歸投事宜具悉卿以將帥之才鎮
華夷之要憂勞為國忠勇忘家聲動寇戎塵清封畧
突厥等響風輸款率屬來賓雖某我懷柔遠無不至
忘因卿威惠導之使來念其歸投宜有優賜今賜衣
服及段匹等自首領已下卿宜等第給付其部落家

口等遠經跋涉宜稍安存以勸歸心用副注意

與元衡詔

勅元衡省所奏當管南界外生蠻東凌六部落大鬼
主苴春等以所管子弟百姓等二千餘戶請內屬黎
州并奏南路蕃界消息者具悉卿以文武之才兼將
相之任仁和下布黎庶獲安威惠旁通蠻夷率附勳
勤斯著倚賴彌深欽矚之懷豈忘寤寐生蠻部落苴
春等以阻聲教遠此歸投願屬黎州請通縣道勉於
撫慰以勸將來所奏蕃界事宜俱已知悉戎虜雖聞

喪敗封疆不可無虞亦宜隄防用副憂矚

與陸庶詔

勅陸庶省所奏當管新開福建陸路四百餘里者具悉卿望重周行寄分越徼嘉聞素著茂政累彰况勤可使人智能創物廢驚波之路開砥石之途捨舊謀新以夷易險財力不費商旅斯通惠既及人勳非擾下績用可尚欽嘆良深

與宗儒詔

勅宗儒卿邦家賴幹班列羽儀嘗作股肱弼諧無怠

及司管箠鎮靜有方欽重之懷寢興不捨春官之長非賢不居既簡朕心亦符人望今授卿禮部尚書并賜官誥往除餘慶東都留守卿宜便與交割即赴上都想宜知悉

與希朝詔

勅希朝省所奏党項歸投事具悉卿邊隅寄重關外事繁威行而軍聲外揚信及而戎心內附勳皆長効進必盡忠勞績彌彰倚望尤切党項拓拔忠敬等項雖為盜今已經恩懼而歸投情可容恕許其後効以

補前非卿宜安存無使疑懼其磨梅部落等尚能繼
至六許自新宜加招撫令知朕意

與韓弘詔

勅韓弘任光輔至省所陳請具悉卿文武全畧邦家
重臣自居大藩厥有成績輯寧百姓嚴整三軍使予
無憂惟尔之力省茲章奏懇願朝宗誠嘉深衷難遂
勅請朕以梁宋之地水陸要衝運路咽喉王室藩屏
人疲易散非卿之惠不能安師衆難和非卿之威不
能戢今衆方悅附人又知歸鎮撫之間事難暫輟雖
戀深雙闕積十年而頗勞然倚為長城捨一日而不
可勉卿忠力布朕腹心宜體所懷即斷奏表

與嚴礪詔

勅嚴礪省所奏進蒼角鷹六聯具悉卿任重列藩寄
兼外閫事皆奉上勅必竭誠時屬勁秋致茲鷙鳥調
習成性進獻及時取其効用之能足表盡忠之節

與韓弘詔

勅韓弘卿苦心奉國極累撫人惠彼一方于茲十載
歷展勤王之勅累陳戀闕之誠才以任彰節因事著

不加殊寵何表成功夫外擁旌旄取牙之任重內參
台衮股肱之寄深以爾一心授茲二柄永言倚賴當
副誠懷令除卿同中書門下平章事依前宣武軍節
度等使餘並如故并賜官誥往想宜知悉

與李安詔

初李安劉清潭至省所奏具州宗城縣百姓弘為毋
病割股充祭事宜具悉卿任重弼諧寄深鎮守勤撫
綏之政贊燮理之功至使鄙人忘身展考雖因心有
感誠化教之時風而率下可知足表卿之德行省茲

陳奏欽歎良深

與茂昭詔

勅茂昭盧校至省所陳奏具悉卿善戴君親出入將
相久專戎閫累覲王庭忠勞必竭其智謀誠懇無形
於章表近者志在憂國慮及安邊請率精兵親防黠
虜朕以卿當管軍鎮寄重事殷實藉撫綏用安封部
雖未允所請而深嘉乃誠令又密奏恒州具申曲盡
忠勤之節備知丹赤之心言念再三發於嗟嘆眷重
之至併在予懷想宜知悉

與潘孟陽詔

勅孟陽卿素懷才畧早振聲猷歷踐班行累彰勳効
自守關輔克舉藩條惠及蒸黎威行軍鎮永言斯任
未展其能朕以東川蜀門重鎮弊承軍後雄厯險中
思得忠勤之臣撫此凋殘之俗量才注意無以易卿
今授卿劍南東川節度觀察等使併賜卿官誥往想
宜

與韋丹詔

勅韋丹竇從直至省所陳賀并奏江饒等四州旱損

其所欠供軍留州錢米等并已放免又奏權減俸及
脩造陂隄并勸課種蒔粟麥等事宜具悉朕頃緣時
早慮害農功雖推咎已之心敢望動天之德而未愈
洽日膏澤霈然仰荷玄休俯增祇惕卿喜深稱慶忠
切分憂既覽賀陳兼詳奏請至如蠲逋以卹人隱減
俸以濟軍湏抑末業而移風務茲菽麥防旱年而歎
雨脩利陂塘皆合其宜並依所奏非卿公勤奉上仁
惻發中則共理之心不能至此再三興歎一二難申
勉於始終以副朕意想宜知悉

與從史詔

勅從史史漸至省所陳謝具悉卿亡父早踐班榮以
著聲績允言褒贈自叶典常况卿孝友承家勤勞事
國念茲忠節皆稟義方將慰匪莪之心宜流自禁之
澤豈為殊渥頻至謝章

與崇文詔

為頻請朝觀而尤值寒月霜嚴道阻且長之際意時崇文為西川節度使故獻章以表親耳

勅崇文卿忠廉立身簡直成性董戎長武遠候父安
授律西川亮徒蕩滅是以寵崇外閭秩進上公而能

省事安人多方撫俗諭朕念功之旨勉其師徒宣朕
卹隱之心慰彼黎庶威立無暴功成不居累陳表章
懇請朝覲雖啟邦之寄重誠欲藉才而望闕之戀深
固難奪志且嘉且嘆彌感于懷屬時候嚴凝山川脩
阻永言跋涉當甚勤勞佇卿來思副朕誠望想宜知
悉冬寒卿比平安好遣書指不多及

王承宗詔

勅王承宗朕臨馭天下及此五年三叛誅夷四方清
泰不以武功自負常推恩信為先尔父云亡即欲命

卿受詔而遠近方鎮内外人情紛然奏陳皆云不可
朕以卿累代積勲賢之業一門有忠義之風功著艱
危恩連姻戚雖中心是念而衆情難違可否之間又
不能決然亦欲觀卿進退之禮察卿忠孝之心卿自
罹憫凶倏經時月待使臣而動皆得禮奉章疏而言
必由衷請獻官員願輸貢賦而又上陳密款遠達深
誠潔身而謀出三軍損已而讓推二郡斯有以得臣
子之大節知君親之大恩公卿既然朕意亦定特加
新命仍撫舊封命授卿起復左金吾衛大將軍檢校

工部尚書充成德軍節度使恒州刺史恒冀深等
州觀察等使兼御史大夫仍賜上柱國并賜誥身旌
節等徃想卿忠孝哀感兼深其德隸兩州以卿退讓
元欲卿於親屬之內選授一人在法雖有推恩相待
亦恐非便今所以除薛昌朝德隸兩州觀察使昌朝
昔嘗事卿先父今又與卿親鄰卿宜具以誠懷令報
昌朝知悉卿今授命之後足得節制三軍使其不失
事宜方見卿之忠蓋昨者衆情易惑非卿不能効此
誠羣議難排非朕不能斷此意所宜保持大義勉勵

遠圖深念斯言永副予望其當軍大將已下各宜特
與改轉卿即條錄聞奏其官徒等亦宜量加優賞想
宜知悉

與茂昭詔

勅茂昭盧校等至省所奏桓州事宜并別論請陳獻
者卿望重勲賢寄崇藩鎮謀參廟筭寵接國姻累上
表章繼陳誠款永言智畧已見匡濟之才載念公忠
益表感知之志若非勞瘁憂國義勇忘家則丹赤之
心不能至此想風興歎至于再三所緣恒州事宜朕

亦思之甚孰但以武俊率身投順於國有功忠勲所
延宜及後嗣承宗又密陳深款遠獻忠誠既念舊勞
已降成命計其奉詔必合感恩如或乖違續有商議
卿宜以睦隣為事體國為心想卿誠懷當悉朕意

與師道詔

勅師道省表具悉卿業重相門位崇戎閫忠輸于國
行著于家久而益彰嘉歎無已所奏亡兄師古請列
于私廟昭穆者此乃心推孝友誠切恭敬覽表見情
深足嘉尚但以祠廟所見貴於禮成師古雖則始營

至卿方行祔禮即卿為廟主固合其宜况師古爵位
尊崇弘選自合祔廟別立祠宇使其主之奉以蒸嘗
亦非之祀也已令有司重議如此頗謂得中宜今禮
經卿宜知悉

與於陵詔

勅於陵省所賀安南破環王國賊帥李樂山等三萬
人者具悉卿蠻夷犯疆方鎮致討克捷喪敗荒微清
平卿素蘊忠誠又連封壤疾既同於山藪勢益壯於
輔車想聞捷書當倍惻愜載省所賀深見乃懷

與希朝詔

勅希朝省附奏請自部領當道兵馬一萬五千人取
尉州路赴行營并奏土門及承大軍各添兵士備禦
者具悉卿武毅雄才忠貞大節出為良將倚作信臣
約已徇公忘身許國忿違令不恭之寇激勸王自劾
之心親統銳師率先羣帥况又周知要害備設防虞
計其威聲已振克醜有臣如此朕復何憂佇建殊功
以副深望所有動靜宜數奏聞想當知悉

與師道詔

勅師道朱何至省所奏當道赴行營兵馬取正月過
渡河遂便攻討并奏兵馬出界後請自供一月糧料
又奏待收下城邑若有軍糧二月已後續更支計并
陳謝慰問者具悉卿文武間生忠貞特立動有所勅
知無不為昨獻帛助軍極盈數於萬疋今又齎糧出
境減經費於三旬此乃力之所任無不罄竭慮之所
及無不經營因時見憂國之心臨事識忠臣之節詔
書慰諭未盡朕懷章疏謝陳益嘉乃志再三興歎寤
寐難盡其所奏聞並依來表想宜知悉

與劉濟詔

勅劉濟李舉至省表及露布十二月十七日劉緄部
領當道行營兵馬收下饒陽縣破賊衆三千人并擒
斬將校收獲馬畜器械等無送賊將胡履清等四人
又進所收饒陽縣等者具悉卿盡忠伐叛發漁陽精
銳之師緄伏順臨戎討冀方昏狂之寇詔下而父子
戮力鼓行而將卒齊心先羣帥以啓行首諸軍而告
捷連擒逆將併下賊城歸獻罪之俘囚進已收之縣
邑可謂忘身徇國盡禮事君疾風知偃草之心大雪

見貞松之節况表章之內益歎恭勤而眷想之間如
覩丰采計茲兇醜當已震驚破竹之勢可乘覆巢之
期非遠佇清大憝重副深懷其饒陽縣卿宜且令鎮
守稍加存撫用勸將來宋常春卿所密奏具悉事情
且宜叶和以體朕意故令宣慰望當知悉

與李安詔

勅李安省所奏當道行營兵馬取今月十七日已收
棗強縣其賊棄城夜走者具悉卿輔忠報國嫉惡忘
家遣無敵之師伐不韞之寇軍聲遠屈先路以風行

逆虜潛知棄城而宵遁已收縣邑益振兵威此皆卿
訓練所加指麾有素永言明効實屬深懷固可乘勢
應機逐便攻討以卿忠藎宜副朕心

與希朝詔

勅希朝張嘉和至省所奏前月二十六日破逆賊泗
湟鎮六千餘人具悉卿親領銳師誓誅逆黨張軍威
以吞敵奮士力而指從潛戒偏裨先攻險阻伐謀而
事有成美尅日而勤不愆期果敗兇徒遂據要地况
殺傷既衆收獲頗多益壯軍威可奪虜氣佇聞掃蕩

以慰衷懷

與從史詔

勅從史曹公義至省所奏本月三日栢鄉縣南破賊衆約三萬人并擒首斬級收獲器械及馬等又奏當軍所傷士馬數并量事優恤事宜具悉卿外揚武畧內竭忠謀率有名之師深入其阻遇無狀之寇大挫其鋒兵刃屢加捷書頻至殺傷數廣績効居多非卿悉力摧兇誓心報國則何能指麾之下勅必成功表奏之間事皆審實既光重委益副深懷嘉歎再三不

忘寤寐所奏承瓘出軍合陣并續發露布事宜具委所陳望當知悉

與李安詔

勅李安許峯至省所奏具悉卿勲親重德台輔元臣竭誠信以戴君弘識度而體國謀能極慮言必盡忠周覽表章益增寤歎兵少陽自叅軍務頗効恭勤豈待奏陳已有處分想宜知悉

與昭義軍將士詔

勅昭義軍鄧度下將士等卿等當軍將士與諸道不

同自經艱難名登將士而忠順之節未嘗有虧朕每
思之無時暫忘盧從史為卿主將作朕藩臣權位尊
崇恩寵優厚而乃外示恭順內懷邪刻削軍中暴
殄境內朕以君臣之道未忍發明為之含容頗有年
月近又苟求起復請討恒州與賊通謀為國生患自
領士馬以屯行營收當軍賞設之資加本道芻粟之
估不為公用盡入私家此則主將之惡於卿何有臣
子之分負朕實深卿等辨邪正之兩端識逆順之大
義抱忠勇者恥居其下守名節者憤發于中央三軍
之心已聞大去犯衆人之怒果見不容速察事宜備
知誠欵興言嘉歎至于再三其當軍將士等賞設已
有處分上自將校下及士卒各勵尔志再思朕言卿
等承前已來常保忠貞之節自今已後永為腹心之
軍宜令始終副茲矚望故令宣慰宜並悉之夏熱卿
等各得平安想宜知悉

與承瓘詔

勅承瓘卿總領禁軍控臨戎境見敵每彰其勇敢因
事益表其忠勤言念在懷發於寤歎昭義軍將士等

去邪速惡仗義保忠統其成師宜得良帥孟元陽夙
懷武毅累著功庸威名甚彰人望所屬以之為帥必
愜軍情以之討賊必有勲績今授元陽檢校尚書右
僕射充昭義軍節度等使未到行營間其昭義軍卿
宜切加宣撫務使安寧烏重胤職在偏裨保於忠正
宜從獎擢以表殊恩今授烏重胤河陽節度使兼御
史大夫卿亦宜諭此恩意令知朕心無恐河陽無人
速宜進發想當知悉

與元陽詔

勅元陽澤潞全軍方討恒冀盧從史虧失大節包藏
二心鄙跡邪謀日已自露軍情物議俱所不容尋追
赴朝今已在道朕以昭義將士忠順成風况在行營
久勤戎事今欲使其戰者奮發居者悅安共成大功
必在良帥以卿有澱水之勲効有河陽之政令思之
甚孰無以易卿宜領重藩乃遷崇秩今授卿檢校尚
書右僕射充澤潞節度等使并賜旌節告身等往卿
宜速發先到潞府上訖便赴行營慰安軍心宣諭朕
意烏重胤徇忠守節宜加獎用今便授重胤河陽節

度使兼御史大夫想宜知悉

與師道詔

勅師道林英至省所陳奏并進王承宗與卿書者具悉王承宗童騃無知克囂有素雖藉父祖之寵曾微分寸之勞但以武俊勲在用書姻連戚屬朕獨排羣議特降殊私未卒父喪使承祖業即加新命仍撫舊封則朕於承宗恩念至矣而偽陳誠欺欺誑使臣假託軍情拒違詔命則承宗於朕罪莫大焉恃禮亂心暴於天下此乃承宗干國家之紀非朕忘武俊之功

遂至用師蓋非獲已仍開生路許以自新而梟音不悛張益熾人情共棄國典不容在於朕心安敢輕捨既膺注意義感酬恩所獻表章具已詳覽慮深遠計詞切謹言在忠謀而則然於事體而未可誠嘉勤至難允懇懷令諸道將帥親領士馬深入寇境頻奏捷書四面合為一心旅進窮逼已甚覆滅非遙况卿同遣師徒已收縣邑奠清氛孽佇見功名勉於令圖副此矚望

與師道詔

勅師道任文質至省表具悉盧從史頃者請率全師
誓請妖孽朕推誠待物許之不疑而背恩於上結怨
於下邪謀二志日以彰聞虧大節而自絕於君積羣
怒而不容於衆因以邀命卒而脫身屈法伸恩已有
處分昨者詔旨已明示卿卿體國為心事君盡力固
宜有聞必薦有見必陳竭其忠諒之誠濟其獻納之
美省閱章奏嘉歎良多

與執恭詔

勅執恭王克謹至省所奏今月八日進收平昌縣已

令鎮守并奏劉濟欲與卿約議事者具悉卿奉辭伐
罪仗節啓行指顧偏禪收復城邑已令鎮備無務緝
緜威惠之方既明弔伐之義斯在永言倚任彌注哀
情劉濟將相大臣與卿先父同列欲求契約固合允
從豈惟繼好私情亦足叶心王事載省來奏深鑒乃
誠至於寢興不忘嘉矚

與承宗詔

勅承宗頃者盧從史包藏鄰詐矯示忠公下誣物情
上惑朝聽使卿陷於違命使朕至於用兵交亂君臣

罪有所在令從史已正刑典遠棄驩州構亂者既就
屏除誘陷者自宜明白况卿代連姻戚朕豈不思祖
有功勞朕豈不念事不得已勢至如斯棄絕已來常
懷憫惻卿今既陳章疏懇獻衷誠請進官員願脩貢
賦誓心以納款歸罪而責躬情可哀憐法存開釋朕
託于人上及茲六載體天地含弘之德厚君臣始終
之恩常以人安為心豈欲物失其所今所以開獨見
之路降非常之恩卿及將士等已具制書並從洗滌
卿仍復舊官爵使克恒冀深趙德諫等州節度觀察

等使并賜旌節誥身等徃爵土仍舊君臣如初想卿
中懷當知自感所宜追補前悔勉勤後圖夙夜思之
永副朕意想當知悉

與劉濟詔

勅劉濟省所謝男紹及孫景震等授官并謝賜器仗
弓甲刀斧等者具悉卿文武全才將相重任本於忠
諒成此勲勞尚德尊賢位已極於台輔念功懋賞寵
宜及於子孫時論允歸朝章斯舉至於出茲戎器賜
我元臣但可以伸朕私恩未足以表卿功績載覽來

表備見乃誠併此謝陳益嘉勤蓋

與吉甫詔

勅吉甫韓用政至省所奏陳謝具悉卿忠貞立身文武為德志惟經國謀不忘君才可以雄鎮方隅故委之外閫智可以密叅帷幄故任以中樞而能一其衷心再有冲讓雖勞謙彌切每陳丹府之誠而愛寄方深難輟紫垣之務勉諭已伸於前詔忠勤載露於來章今征討已停方隅稍泰克清之日雖則不逞難奪之心亦宜且抑重此宣諭當體朕懷是推至公煩有

陳謝

與鄭綰詔

勅鄭綰省所奏邕管黃少卿及子弟等事宜具悉卿望重中朝寄深南服誓敷惠政佇化遠人言念忠勤不忘監寤山洞夷落易擾難安比來撫之未及其道覽卿所奏頗合其宜歲時之間當革前弊勉於招諭以副朕心

與劉總詔

勅劉總卿業繼將門才兼武畧累臨軍郡悉著良能

嚴以弓裘宜加旄鉞仍舉奪情之典以昭延賞之恩
今授卿起復雲麾將軍檢校工部尚書充范陽節度
等使并賜旌節官誥想宜知悉

與茂昭詔

勅茂恩王日興至所省表陳讓檢校太尉者具悉卿
文武大僚勲戚重望累展朝宗之禮足表恭敬之心
况多戰伐立功彌彰勤蓋言念及此每用嘉焉宜加
寵榮已降新命何至謙讓仍辭舊官眷倚之懷並具
前詔想宜知悉

與劉總詔

勅劉總康志安至省所謝陳具悉卿之先父為朕元
臣大節殊功歿而不朽宜加恩禮俾治哀榮故命宰
臣為之撰錄卿義深報國孝重承家既感顯親之恩
願竭戴君之節遠有奏謝益用嘉之想宜知悉

與房式詔

勅房式卿以良才尹茲東洛公忠無怠聲績有聞嘉
歎之深寧忘寤寐宣城重寄深在得人藉卿政能往
就綏撫今授卿宣州刺史兼御史中丞宣歙等州都

團練觀察置等使并賜誥身往卿宜便起赴本道勉
脩所任以稱朕懷想當知悉

與盧恒卿詔

勅盧恒卿累登朝序皆著公方自領藩條益彰理行
恪恭而奉上勤儉以牧人不加寵榮何勸來者朕以
擢管漕運軍國所資其務甚殷所寄尤重以卿有忠
勞之前効幹濟之長才常簡朕心宜授此職今除卿
尚書刑部侍郎充諸道鹽鉄轉運使并賜誥身往宜
即赴關庭想當知悉

與孫疇詔

勅孫疇劉德惠至省所遣隴右地圖兼進戰車陣圖
車樣及奏陳收復河湟事宜者具悉卿尹茲右輔固
乃西疆創制戎車繕脩軍實思收故地誓立殊勲載
覽陣圖兼詳所奏誠得開邊之畧益嘉報國之心斯
謂盡忠彌增注意眷言所至無忘于懷

與李良僅詔

勅李良僅卿久在軍門習知邊事居常恭恪勳必忠
勤眷乃才良可分憂寄今授卿延州刺史兼安塞軍

使并賜官誥往延州既兼軍鎮且雜蕃戎防遏撫綏
兩湏得所宜勉所任用副朕懷

白樂天文集卷之一